

# VELDWERK

**Visie:** Om volwassenes op te lei om kinders 'n liefde vir en kennis van die veld te gee, en self ook verryk te word.

**Missie:** Gemaklike veldaktiwiteite, spesialisasies en graadwielwerk.

## A. OPLEIDINGSPLAN

### SLEUTELDOELWIT

- Om die kursusganger toe te rus met die nodige kennis van die veld.
- Om die kursusganger bepaalde vaardighede in die veld te laat bemeester.
- Om 'n liefde vir die veld te ontwikkel.
- Om die veld te ondersoek en te bewaar.

### TEIKENGROEP

Alle volwasse lede van die Voortrekkers.

### TOELATINGSVEREISTES

- Moet 'n ingeskrewe lid van die Voortrekkers wees.
- Moet die nodige inskrywingsvorm voltooi en kursusgeld betaal het.
- Moet die nodige voorafwerk voltooi het, indien van toepassing.
- Moet die vooraf leerwerk gedoen het, indien van toepassing.
- Moet fisies in staat wees om gemaklik in die veld te kan beweeg.

### KURSUSLEIER

- Moet 'n wye ervaring van die veld hê of 'n span aanbieders insluit met gespesialiseerde kennis.
- Daar moet 'n balans wees tussen kennis en vaardighede wat aangeleer word.
- Die standaard hier beskryf is minimum riglyne en kursusleiers kan uitbrei waar hulle dit nodig ag, maar alle aktiwiteite moet wel aandag geniet en **een** behoort nie te veel tyd in beslag te neem ten koste van ander nie.

## B. WERKSKEMA

Algemene vertrekpunt: die ABC moet in al die aktiwiteite die uitgangspunt wees en nie afsonderlike aktiwiteite op die program nie<sup>1</sup>.

### AKTIWITEITE

- 01 Groepdinamiese proses
- 02 God en Skepping
- 03 Grond en Rots
- 04 Water
- 05 Lug
- 06 Ekostelsels en Habitat
- 07 Natuurbewaring
- 08 Weerkunde
- 09 Plantegroei

---

<sup>1</sup> Byvoorbeeld, by Natuurbewaring moet die kursusganger kennis neem van waar hy/sy as landsburger deel van die natuurbewaringstruktuur kan vorm.

- 10 Dierekennis
- 11 Veldhigiëne
- 12 Touwerk
- 13 Toerusting
- 14 Noodhulp en Gebeurlikheidsbeplanning
- 15 Oriëntering
- 16 Skuilings
- 17 Vuurmaak
- 18 Veldkook
- 19 Sterrekunde
- 20 Oorlewing
- 21 Veldwaarneming
- 22 Evaluering

### **C. SPESIFIEKE DOELWITTE**

#### **AKTIWITEIT 1 GROEPDINAMIESE PROSES**

##### **SPESIFIEKE DOELWIT**

Om die kursusganger geleentheid te bied om mekaar te leer ken en die kursusdoelwitte te begryp.

##### **STANDAARD Dat die kursusgangers**

- (a) mekaar leer ken;
- (b) kennis neem van die kursusdoelwitte en dat kontraksluiting plaasvind.

#### **AKTIWITEIT 2 GOD EN SKEPPING<sup>2</sup>**

##### **SPESIFIEKE DOELWIT**

Om aan die kursusganger geleentheid te bied om te ervaar hoe God Hom deur die Skepping openbaar.

##### **STANDAARD Dat**

- (a) die wonder van die skepping ervaar word;
- (b) die opdrag van die mens in die natuur begryp word (bewerk en bewaar);
- (c) die verantwoordelikheid teenoor die skepping besef word.

#### **AKTIWITEIT 3 GROND EN ROTS**

##### **SPESIFIEKE DOELWIT**

Om aan die kursusganger te verduidelik hoe 'n groot rol die behoud van grond in die mens se lewe speel.

##### **STANDAARD Dat die kursusganger**

- (a) 'n inleidende kennis opdoen van geomorfologie, toegelig met die plaaslike omgewing se geologie;
- (b) die gevare van erosie en die bekamping daarvan bespreek;

---

<sup>2</sup> Dit moet geïntegreer word in al die aktiwiteite deur die hele kursus

- (c) die wisselwerking tussen grondtipe, helling, en reënval verstaan, wat aanleiding gee tot verskillende plante en diere.

#### **AKTIWITEIT 4 WATER**

##### **SPESIFIEKE DOELWIT**

Om aan die kursusganger die belangrikheid van water tuis te bring.

##### **STANDAARD Dat die kursusganger**

- (a) besef dat water die heel belangrikste element van voeding is (bv. eetstakers in tronke drink net water en oorleef 2 maande!);
- (b) die eienskappe van bruikbare (skoon) water ken;
- (c) watersuiweringstegnieke bemeester waar nodig;
- (d) kennis neem van siektes wat deur water versprei word (cholera, bilharzia, oop water);
- (e) kennis neem van gevare van waterbesoedeling;
- (f) weet waar om vir water in 'n oorlewingsituasie te soek (plante, ondergronds, diere, ens.);
- (g) 'n waterhouer kan prakseer.

#### **AKTIWITEIT 5 LUG**

##### **SPESIFIEKE DOELWIT**

Om by die kursusganger die noodsaaklikheid van skoon lug tuis te bring.

##### **STANDAARD Dat die kursusganger**

- (a) aangemoedig sal word om deel te neem aan die nasionale debat oor die voorkoming van lugbesoedeling;
- (b) die elemente waaruit lug bestaan ken;
- (c) die invloed van lugbesoedeling op mens, dier en plantelewe besef;
- (d) 'n aksieplan kan opstel van hoe lugbesoedeling vermy kan word;

#### **AKTIWITEIT 6 EKOSTELSELS EN HABITAT**

##### **SPESIFIEKE DOELWIT**

Om aan die kursusganger die beginsels van 'n ekostelsel tuis te bring.

##### **STANDAARD Dat die kursusganger**

- (a) besef hoe die natuur selfonderhoudend is – bioties en abioties;
- (b) besef hoe die mens die natuurlike ekostelsel beïnvloed;
- (c) die spesifieke habitat van die kursusomgewing sal verstaan en fauna en flora wat daar voorkom kan beskryf;
- (d) die begrippe bemeester – habitat, ekostelsel, bioties, abioties, kosmos ens.

#### **AKTIWITEIT 7 NATUURBEWARING**

##### **SPESIFIEKE DOELWIT**

Om die kursusganger vertrouwd te maak met die komponente wat onder natuurbewaring tuishoort.

**STANDAARD Dat die kursuganger**

- (a) besef hoekom die natuur bewaar word;
- (b) faktore identifiseer wat die natuurlike omgewing bedreig (besoedeling, indringer-spesies, menslike en natuurlike versteuring van die habitat);
- (c) 'n oorsig kry van formele (wildtuine) en informele (privaat) bewaringstrukture in sy omgewing;
- (d) kennis neem van beskermde plante – veral in sy eie omgewing.

**AKTIWITEIT 8 WEERKUNDE****SPESIFIEKE DOELWIT**

Om aan die kursuganger bepaalde kennis en vaardighede deur te gee om weersomstandighede te interpreteer.

**STANDAARD Dat die kursuganger**

- (a) eenvoudige weerpatrone kan interpreteer;
- (b) die weerberigte oor die radio en televisie kan verstaan;
- (c) 'n noodsituasie wat deur skielike weersveranderinge teweeg gebring is kan hanteer (weerlig, storms, sneeu, winde of oorstromings).

**AKTIWITEIT 9 PLANTEGROEI****SPESIFIEKE DOELWIT**

Om die kursuganger vertrouwd te maak met 'n bepaalde hoeveelheid kennis van plante en vaardig te maak in die uitken van plante.

**STANDAARD Dat die kursuganger**

- (a) 'n breë indeling van die planteryk sal kan doen: voorplanting deur selverdeling, spore, naaksadiges / bome, struik, grasse ens;
- (b) geleentheid kry om bepaalde plante van die omgewing uit te ken en dat die geaardheid bespreek word;
- (c) kennis opdoen hoe plante geïdentifiseer word in 'n nuwe omgewing - spesifiek t.o.v. uitheemse/indringerplante, bedreigde spesies en gifplante;
- (d) besin oor die gebruikswaarde van bepaalde plante in die omgewing - spesifiek t.o.v. voedselplante, plante as bron van water en veldplante van medisinale belang).
- (e) 'n versameling van plante maak en dit identifiseer.

**AKTIWITEIT 10 DIEREKENNIS****SPESIFIEKE DOELWIT**

Om die kursuganger vertrouwd te maak met 'n paar aspekte van die dierelewe.

**STANDAARD Dat die kursuganger**

- (a) 'n basiese indeling van die diereryk kan maak bv. gewerweld, ongewerweld, voëls, soogdiere, koudbloedig, warmbloedig;
- (b) die inleidende beginsels van voëlidentifisering leer;
- (c) geprikkel word met die bestudering van soogdiere;
- (d) 'n basiese oorsig kry oor reptiele en die hoofgroepe kan identifiseer;
- (e) inleidende beginsels van insek- en arachnida-identifisering leer;
- (f) inleidende beginsels van amfibië leer;

(g) die dierelewe bestudeer met inagneming van die volgende:

- |                              |                                       |
|------------------------------|---------------------------------------|
| * Tekens van teenwoordigheid | * Natuurlike tuiste                   |
| * Waterdrinkgewoontes        | * Nut vir die natuur                  |
| * Nut vir die mens           | * Wetlike aspekte (bedreigde spesies) |

## **AKTIWITEIT 11 VELDHIGIËNE**

### **SPESIFIEKE DOELWIT**

Om die beginsels van higiëne in die veld by die kursusganger tuis te bring.

### **STANDAARD Dat die kursusganger**

- (a) besef hoe belangrik goeie higiëne in die veld is (hande was, kos voorberei, skoon kombuis ens.);
- (b) vertrou raak met verskillende sanitêre geriewe in die veld (puttoilet en kat sanitasie);
- (c) vertrou raak met die hantering van afvalstowwe in die veld (biologies afbreekbaar, nie afbreekbaar – neem huistoe).

## **AKTIWITEIT 12 TOUWERK**

### **SPESIFIEKE DOELWIT**

Om die kursusganger vertrou te maak met touwerk wat in die veld benodig word.

### **STANDAARD Die kursusganger moet**

- (a) die volgende knope bemeester: skuifknoop, kniehalterslag, booglyn, kruisvaswoel en voorslagknoop;
- (b) hierdie knope prakties kan gebruik, soos bv. om meubels te maak, skuilings te bou, vrag vas te maak, te abseil ens.

## **AKTIWITEIT 13 TOERUSTING**

### **SPESIFIEKE DOELWIT**

Om die kursusganger geleentheid te bied om 'n velduitstappie, met 'n oornaggeleentheid, van A tot Z te reël. (Wenk: hou gebeurlikheidsplan in gedagte – sien onder)

### **STANDAARD Dat die kursusganger**

- (a) prakties leer om volle verantwoordelikheid te neem vir die beplanning en uitvoering van 'n uitstappie, ingesluit alle toerusting;
- (b) leer hoe om 'n rugsak optimaal te pak, te gebruik en te onderhou.

## **AKTIWITEIT 14 NOODHULP EN GEBEURLIKHEIDSBEPLANNING**

### **STANDAARD Dat die kursusganger**

- (a) die volgende probleme wat in die veld kan ontstaan kan identifiseer en hanteer:
  - noodhulp (kursusganger moet opgeskerp word in die volgende):
    - i. noodhulpprioriteite – volgorde van optrede
    - ii. brandwonde
    - iii. blase
    - iv. dehidrasie/oorhidrasie

- v. hipotermie
  - vi. hittesteek/hitteuitputting
  - vii. skok
  - viii. verstuiting
  - ix. asma
  - gebeurlikheidsbeplanning (vooraf en tydens)
    - i. gastro
    - ii. brand – tent
    - iii. swaar reën
    - iv. kind vermis
    - v. verdwaal – alleen of groep
    - vi. weerlig
    - vii. wind
- (b) 'n noodhulptas vir 'n kampuittappie kan beplan.

## **AKTIWITEIT 15: ORIËNTERING**

### **SPESIFIEKE DOELWIT**

Om die kursusganger vertrouwd te maak met die metodes om in die veld te oriënteer en te beweeg.

### **STANDAARD Dat die kursusganger**

- (a) rigting kan bepaal met die volgende metodes:  
kompas, horlosie (son), sterre en skadustok;
- (b) 'n kaart met 'n kompas en horlosie kan oriënteer;
- (c) gemaklik kan omgaan met 'n kaart van die omgewing;
- (d) sy posisie met lengte- en breedtegrade kan weergee;
- (e) blootgestel word aan 'n GPS.

## **AKTIWITEIT 16: SKUILINGS**

### **SPESIFIEKE DOELWIT**

Om die gebruik van skuilings aan die kursusganger oor te dra.

### **STANDAARD Dat die kursusganger**

- (a) redes verskaf waarom skuilings gebou moet word (oorlewing, beskerming teen natuur, beskerming teen ongewensde elemente);
- (b) beginsels van goeie skuilings kan noem;
- (c) leer hoe om 'n effektiewe en gemaklike skuiling te bou, sonder om die natuur te beskadig;
- (d) metodes van verberging aanleer.

## **AKTIWITEIT 17: VUURMAAK**

### **SPESIFIEKE DOELWIT**

Om die beginsels van vuurmaak in die veld by die kursusganger tuis te bring.

### **STANDAARD Dat**

- (a) die beveiliging van 'n vuurmaakpunt bespreek word;
- (b) veilige en ekonomiese vuurmaakmetodes bespreek word;

- (c) die hantering van 'n veldbrand op die betrokke terrein bespreek word en gebeurlikheidsbeplanning gedoen word (bv. PD's slaan nooit vuur nie, beveilig voertuie en mense, windrigting en sterkte ens.)

### **AKTIWITEIT 18: VELDKOOK**

#### **SPESIFIEKE DOELWIT**

Om die kursusganger sommige basiese tegnieke van veldkookkuns aan te leer.

#### **STANDAARD Dat die kursusganger**

- (a) 'n effektiewe en higiëniese veldkombuis daar kan stel;
- (b) kookgerei in die veld kan prakseer;
- (c) verskillende gaarmaakmetodes in die veld bemeester (kook, bak, braai en hooikas).

### **AKTIWITEIT 19: STERREKUNDE**

#### **SPESIFIEKE DOELWIT**

Om die kursusganger vertrouwd te maak met enkele sterrebeelde, die sigbare planete en die maan.

### **AKTIWITEIT 20: OORLEWING**

#### **SPESIFIEKE DOELWIT**

Om die kursusganger vertrouwd te maak met die beginsels van oorlewing.

#### **STANDAARD Dat**

- a) die belangrikheid van die totale mens in oorlewing beklemtoon word;
- b) die kursusganger prioriteite in 'n noodgeval kan bepaal (suurstof, water, kos, beskutting ens);
- c) die kursusganger bewus raak van basiese reëls van eetbare en nie-eetbare plante en diere;
- d) die kursusganger 'n kospakkie pak vir 'n dag of tweedaguitstappie met al die elemente van die voedselpiramide;
- e) die positiewe denke en geloofsoortuiging beklemtoon word in 'n oorlewingsituasie.

### **AKTIWITEIT 21 VELDWAARNEMING**

#### **SPESIFIEKE DOELWIT**

Om die kursusganger aan te moedig om oplettend in die veld te wees.

#### **STANDAARD (laaste aktiwiteit – integreer al die kennis sover geleer)**

Dat die kursusganger tyd in die veld spandeer (stap) en die volgende waarneem: oplet na die spore en tekens wat in die omgewing voorkom – nesses, bome, mis, plante, voëls, soogdiere, reptiele, insekte, swamme, geomorfologie ens.